

24/01/2003

Teguran Dr Mahathir perlu diterima secara terbuka

Mahfar Ali

KAHERAH: Teguran D atuk Seri Dr Mahathir Mohamad berhubung perbuatan umat

Islam membuat pelbagai tafsiran bercanggah mengenai Islam hingga mencetuskan kekeliruan dan perbalahan sesama ummah, seharusnya diterima secara terbuka.

Pendapat itu dikemukakan Mufti Johor, Datuk Nooh Gadot dan Timbalan Mufti Kelantan, Datuk Shukri Mohamad ketika diminta mengulas ucapan Perdana Menteri pada ceramah anjuran Universiti Al-Azhar di sini kelmarin, sempena lawatan kerja dua hari ke Mesir berakhir semalam.

Nooh yang turut menyertai rombongan Dr Mahathir berkata, aspek perpaduan dan persaudaraan ummah yang dibangkitkan Perdana Menteri menjadi kunci kekuatan umat Islam.

"Tidak ada erti pembangunan kalau perpaduan umat Islam tidak dapat dijelmakan," katanya kepada wartawan Malaysia.

Dalam ceramah bertajuk Perpaduan Islam Dalam Menghadapi Cabaran dan Ancaman, Dr Mahathir antara lain mengajak umat Islam kembali berpegang pada asas ajaran Islam yang menekankan aspek keamanan dan persaudaraan ummah.

Perdana Menteri berkata, umat Islam kini jelas kehilangan arah dan keliru berikutan perbezaan tafsiran mengenai Islam yang dibuat tanpa memberi penekanan terhadap ajaran asas Islam.

Dr Mahathir memberi banyak contoh mengenai tafsiran bercanggah mengenai

Islam, seperti menganggap sains dan teknologi sebagai subjek sekular dan di Malaysia sendiri penduduk Islamnya berpecah akibat tindakan pemimpin sebuah parti politik Islam memesongkan ajaran Islam, termasuk menuduh sesiapa yang tidak menjadi ahlinya sebagai kafir dan mengundi parti itu dalam pilihan raya diberi jaminan syurga.

Nooh berkata keberanian Perdana Menteri membangkitkan perkara itu mencerminkan keprihatinannya mengenai masa depan umat Islam bukan saja di Malaysia, malah seluruh dunia.

Sementara itu, Shukri berkata perkara yang dibangkitkan Dr Mahathir memang menjadi tuntutan agama Islam.

"Kalau kita sentiasa membuat semakan terhadap kelemahan diri sendiri terutamanya berhubung kefahaman agama itu sendiri, kalau kita dapat perbetulkan balik yang ini, umat Islam akan kembali kuat," katanya.

Mengenai perbuatan memesongkan agama yang dilakukan pemimpin sebuah parti politik di Malaysia, beliau berkata: "Itu sebagai contoh saja. Tetapi sebenarnya di seluruh dunia Islam, ada elemen macam apa yang berlaku di Malaysia. Walaupun nampak macam tempatan, tapi isu itu ialah isu dunia."